




PRESIDÊNCIA DO CONSELHO DE MINISTROS

VIII GOVERNO CONSTITUCIONAL



Gabinete Porta-Voz

Komunikadu Imprensa

Sorumutu Konsellu Ministrus iha Loron 26 fulan-juñu tinan 2019

Konsellu Ministrus hala'o sorumutuk iha Palásiu Governu, iha Dili, no asiste apresentasaun husi Ministériu Finansas kona-ba relatóriu avaliasaun kona-ba finansiamentu ba desenvolvimentu atu apoia realizasaun Planu Estratéjiku Desenvolvimentu (PED) no Objetivu sira husi Desenvolvimentu Sustentavel iha Timor-Leste. Avaliasaun kona-ba finansiamentu ba desenvolvimentu ne'e hanesan prosesu diálogo ida ne'ebé lidera husi Governu ne'ebé konsidera fonte finansiamentu nian oioin ba futuro iha prosesu planeamentu integradu ida no buka atu sai nu'udar instrumentu apoiu nian ida ba Governu iha definisaun polítika sira kona-ba reforma nasional tuir Planu Estratéjiku Desenvolvimentu no Objetivu sira husi Desenvolvimentu Sustentavel iha Timor-Leste. Relatóriu ida-ne'e apresenta hanesan rekomendasaun prinsipál sira maka estabeleimentu estratéjia ida kona-ba investimentu nasional, kriasaun estratéjia ida kona-ba finansiamentu integradu, realizasaun kálkulu kona-ba kustu intervensaun nian atu kumpre prioridade sira husi PED, estabeleimentu estratéjia integrada ida kona-ba investimentu iha infraestrutura no nesesidade hodi kria mekanizmu sira atu dezenvolve potencialidade sira husi setór privadu nasional.

Ministériu Finansas mós apresenta proposta kona-ba Rezolusaun Governu, ne'ebé hetan ona aprovasaun husi Konsellu Ministrus, kona-ba Polítika Asisténsia Esterna. Diploma ne'e ninia objetivu prinsipál mak atu asegura katak Asisténsia Esterna saida de'it ne'ebé oferece husi parseiru desenvolvimentu nian sira, aliña ho Governu nia planu no prioridade sira. Polítika Asisténsia Esterna sai nu'udar baze ida ba konstrusaun, manutensaun no fortaleimentu parseria serbisu nian sira ne'ebé efetivu no bazeia ba kuadru planeamentu nian ida no objetivu ne'ebé partilla hamutuk, nune'e mós ba armonizasaun ida entre asisténsia esterna ne'ebé previzivel no fiavel husi parseiru desenvolvimentu nian sira ho husi Governu nia





PRESIDÊNCIA DO CONSELHO DE MINISTROS

VIII GOVERNO CONSTITUCIONAL



Gabinete Porta-Voz

prioridade sira. Dokumentu ne'e sei apresenta iha lora 4 fulan-jullu iha sorumutuk ho Parseiru Dezenvolvimentu Timor-Leste (Timor-Leste Development Partners - TLDP 2019), ne'ebé organiza husi Ministériu Negósius Estranjeirus no Kooperasaun no husi Ministériu Finansas. TLDP tinan 2019 sei foti nu'udar tema "hakle'an koordenasaun ba finansiamentu dezenvolvimentu nian" no sei hala'o iha auditóriu Ministériu Finansas, iha lora 2 no 3 fulan-jullu ho sorumutuk bilaterál sira no iha lora 4 fulan-jullu ho enkontru multilaterál.

Ministru Reforma Lejizlativa no Asuntus Parlamentares, Fidelis Manuel Leite Magalhães, apresenta proposta kona-ba minuta husi Protokolu Kooperasaun Triangulár, entre Sekretaria Estadu Komunikaun Sosiál, Camões, *Instituto da Cooperação e da Língua, I.P.* husi Portugal no Ministériu Relasaun Esteriór no Kultu Arjentina nian. Protokolu kooperasaun nian ne'e ninia objetivu maka atu implementa Projeitu "Konsultóriu Língua nian ba Jornalista sira" [Consultório da Língua para Jornalistas], atu kapasita profisionál komunikaun nasional nian sira kona-ba komponente ida-ne'ebé tékniku liu, liuhusi koñesimentu sira ne'ebé profisionál sira husi arjentina nian fahe. Benefisiáriu sira husi formasaun ida-ne'e maka jornalista timoroan sira husi rádiu, televizaun no imprensa eskrita nian, asesór imprensa nian sira no profisionál sira husi setór komunikaun sosiál nian. Konsellu Ministrus aprova ona proposta kona-ba minuta ne'e no fó ona poder tomak ba Sekretáriu Estadu ba Komunikaun Sosiál, Merício Juvinal dos Reis 'Akara', atu asina protokolu ne'e.

Konsellu Ministrus analiza ona proposta kona-ba Rezolusaun Governu nian, ne'ebé apresenta husi Ministra Finansas Interina, Sara Lobo Brites, kona-ba pagamentu parte kofinansiamentu husi konstrusaun ró pasajeiru nian daruak - Nakroma II. Kontratu kona-ba konstrusaun ró foun ne'e, Governu Timor-Leste no Governu Alemaña asina ona iha lora 31 fulan-maiu tinan 2019 liubá no ho konsiderasaun katak dotasaun ba pagamentu konstrusaun Nakroma II ne'e nian rasik la aloka iha Orsamentu Jerál Estadu ba tinan 2019 nian, proposta ne'e buka





PRESIDÊNCIA DO CONSELHO DE MINISTROS

VIII GOVERNO CONSTITUCIONAL



Gabinete Porta-Voz

atu garante pagamentu parte kofinasiamentu Timor-Leste nian, husi faze dahuluk konstrusaun ba ró pasajeiru nian daruak ne'e. Proposta ne'e sei analiza fila-fali iha sorumutuk Konsellu Ministrus nian tuirmai.

Ikusliu, Konsellu Ministrus aprova ona proposta kona-ba Dekretu Governu nian, ne'ebé Ministériu Edukasaun, Juventude no Desportu apresenta ona, kona-ba ajuda kustu nian ba transporte atu partisipa iha asaun formasaun obrigatória sira ba profesór, dirigente eskolár, funsionáriu no ajente sira ne'ebé hala'o knaar hanesan profesór iha estabelesimentu edukasaun pré-eskolár, ensinu báziku no sekundáriu públiku no sira ne'ebé integra iha rede oferta edukasaun ba servisu públiku, bainhira sira la iha asesu ba veíkulu Estadu nian ka transporte ne'ebé Administrasaun Públika maka organizadu no selu. **REMATA**

